

EEE 1604/2/25
REV 2

CONCLÚIDÍ

Ábhar: Conclúidí ón 60ú cruinniú de Chomhairle an Limistéir Eorpaigh Eacnamaíoch (an Bhruiséil, an 21 Bealtaine 2025)

Tionóladh an seascadú cruinniú de Chomhairle LEE sa Bhruiséil an 21 Bealtaine faoi Uachtaránacht Michał Baranowski, Forúnaí Stáit, Aireacht Forbartha Eacnamaíche agus Teicneolaíochta na Polainne, thar ceann Uachtaránacht Chomhairle an Aontais Eorpaigh. D'fhreastail Sabine Monauni, Aire Gnóthaí Eachtracha, Comhshaoil agus Cultúir Lichtinstéin; Þorgerður Katrín Gunnarsdóttir, Aire Gnóthaí Eachtracha na hÍoslainne; agus Espen Barth Eide, Aire Gnóthaí Eachtracha na hIorua, chomh maith le hionadaithe ón gCoimisiún Eorpach agus ón tSeirbhís Eorpach Gníomhaíochta Seachtraí, ar an gcrúinniú.

Phléigh comhaltaí Chomhairle LEE feidhmiú foriomlán an Chomhaontaithe maidir leis an Limistéar Eorpach Eacnamaíoch (Comhaontú LEE) agus bhí díospóireacht bheartais acu maidir le slándáil eacnamaíoch agus LEE.

An Úcráin

1. Cháin comhaltaí Chomhairle LEE go neamhbhalbh cogadh foghach neamhdhleathach gan chúis gan údar na Rúise ar an Úcráin, agus chuir siad in iúl go dtacaíonn siad go huile is go hiomlán le neamhspleáchas, ceannasacht agus iomláine chríochach na hÚcráine laistigh dá teorainneacha a aithnítear go hidirnáisiúnta. D'áitigh comhaltaí Chomhairle LEE ar Chónaidhm na Rúise a trúpaí agus a trealamh míleata go léir a tharraingt siar láithreach agus gan choinníoll as críoch iomlán na hÚcráine, laistigh dá teorainneacha a aithnítear go hidirnáisiúnta. Chuir comhaltaí Chomhairle LEE in iúl freisin go dtacaíonn siad le síocháin chuimsitheach chóir mharthanach, bunaithe ar an dlí idirnáisiúnta, lena n-áirítear Cairt na Náisiún Aontaithe, agus i gcomhréir le príomhphrionsabail agus príomhchuspóirí Phlean Síochána na hÚcráine. Ba chúis aiféala do chomhaltaí Chomhairle LEE na héifeachtaí leanúnacha atá ag cogadh foghach leanúnach na Rúise ar an Úcráin ar fheidhmiú an Mhargaidh Inmheánaigh. Mhol siad Stáit CSTE LEE uile as bheith i gcomhréir le dearbhuithe agus le bearta sriantacha ón Aontas i gcoinne Chónaidhm na Rúise, chomh maith le gníomhaíochtaí eile a rinne Stáit CSTE LEE i gcomhthráth leis an Aontas agus a Bhallstáit chun cur i gcoinne fhogha míleata na Rúise, rud a léiríonn barr feabhais dhlúth-chomhpháirtíocht an Aontais le Stáit CSTE LEE.
2. Leag comhaltaí Chomhairle LEE béim ar a thábhachtaí atá sé prionsabail agus luachanna bunúsacha uilíocha coiteanna Eorpacha a chosaint, mar shampla, an daonlathas, cearta an duine, an smacht reachta agus prionsabail Chairt na Náisiún Aontaithe. Thairis sin, leag comhaltaí Chomhairle LEE béim ar a dtiomantas don ord idirnáisiúnta riailbhunaithe, agus d'urraim don dlí idirnáisiúnta, lena n-áirítear an dlí daonnúil idirnáisiúnta, a chosaint.

An comhar in LEE

3. Leag Comhairle LEE béim ar an tábhacht leanúnach mhéadaitheach a bhaineann le Comhaontú LEE mar bhonn bunúsach don chaidreamh idir an tAontas agus Stáit CSTE LEE, agus chuir sí i bhfios go láidir a thábhachtaí atá struchtúr décholúnach an Chomhaontaithe. D'aithin sí an méid a rannchuidíonn Stáit CSTE LEE leis an bpróiseas cinnteoireachta i reachtaíocht agus i gcláir an Aontais atá ábhartha do LEE trína rannpháirtíocht i gcoistí, grúpaí saineolaithe, staidéir agus gníomhaireachtaí, agus trí bharúlacha CSTE LEE a thabhairt.
4. Ina theannta sin, d'aithin Comhairle LEE an rannchuidiú dearfach a dhéanann Údarás Faireacháin CSTE agus an Coimisiún Eorpach maidir le faireachán a dhéanamh ar chomhlíonadh Chomhaontú LEE i ngach Stát LEE. Leag Comhairle LEE béim ar a thábhachtaí atá sé go n-iarrfaí ar Airí CSTE LEE freastal ar chruinnithe agus ar chomhdhálacha neamhfhoirmiúla aireachta an Aontais arna n-eagrú ag uachtaránachtaí an Aontais atá ábhartha do rannpháirtíocht CSTE LEE sa Mhargadh Inmheánach. Chuir sí in iúl go raibh sí sásta go bhfuil an tír a bhfuil an uachtaránacht aici faoi láthair, an Pholainn, ag leanúint den chleachtas sin, agus go bhfuil sé i gceist ag na tíortha a thiochfaidh i gcomharbas uirthi an rud céanna a dhéanamh.
5. Leag Comhairle LEE béim ar a thábhachtaí atá Margadh Inmheánach dea-fheidhmiúil chun dálaí don fhás eacnamaíoch agus do phoist nua a chothú ar fud na hEorpa. Meabhraíodh di na tairbhí a bhaineann leis na ceithre shaoirse agus le dálaí iomaíochta comhionanna agus cothroma do ghnólachtaí, agus chuir sí i dtreis go n-éascaítear nuálaíocht, iomaíochas agus trádáil le rialacha an Mhargaidh Inmheánaigh.
6. D'aontaigh Comhairle LEE gur gá iarrachtaí cumarsáide a neartú a thuilleadh i ndáil le Comhaontú LEE agus na tairbhí a bhaineann leis do shaoránaigh agus do ghnólachtaí. Leag sí béim ar an gcaoi a bhfuil eolas níos fearr ar Chomhaontú LEE ar fud LEE ar gach leibhéal chun leas na bPáirtithe Conarthacha uile agus dhea-fheidhmiú an Mhargaidh Inmheánaigh. Chuige sin, thathantaigh Comhairle LEE ar Stáit LEE a áirithiú go gcuirfí faisnéis faoi Chomhaontú LEE ar fáil go héasca, gan bhac.

7. Agus ról tábhachtach an chomhair parlaimintigh agus an chomhair idir na comhpháirtithe eacnamaíocha agus sóisialta á aithint aici, thug Comhairle LEE dá haire an rún ó Chomhchoiste Parlaiminteach LEE, a glacadh an 22 Samhain 2024 in Osló maidir le Tuarascáil Bhliantúil Chomhchoiste LEE ar Fheidhmiú Chomhaontú LEE in 2023.

Idirphlé polaitiúil

8. D'aithin Comhairle LEE gurb í an dlúth-chomhpháirtíocht idir an tAontas agus Stáit CSTE LEE an dóigh is fearr le rathúnas comhroinnte agus cobhsaíocht fhadtéarmach a ráthú. Rannchuidigh an dlúth-chomhpháirtíocht sin le hEoraip atá bunaithe ar an tsíocháin, ar an daonlathas, ar an smacht reachta agus ar chearta an duine. Ba dhíol sásaimh do Chomhairle LEE an t-idirphlé polaitiúil, ar leibhéal na n-airí idir Ardionadaí an Aontais do Ghnóthaí Eachtracha agus don Bheartas Slándála agus airí gnóthaí eachtracha na hÍoslainne, Lichtinstéin agus na hIorua, áit a raibh seisiún neamhfhoirmiúil tuairimíochta ag na rannpháirtithe maidir le hábhair leasa fhrithpháirtigh reatha a bhaineann leis an mbeartas eachtrach, mar shampla caidrimh thrasatlantacha, an Úcráin/an Rúis, an tArtach agus an Meánoirthear, agus leag sí béim ar a thábhachtaí atá sé leanúint den chleachtas maidir le cuireadh a thabhairt d'oifigigh ó Stáit CSTE LEE chuig idirphlé polaitiúil a thionóltar i gcomhar le meithleacha Chomhairle an Aontais. Ba dhíol sásaimh do Chomhairle LEE an Ráiteas Comhphárteach 'Comhar i ndáil leis an mBeartas Eachtrach agus Slándála a neartú' a shínigh an tArdionadaí agus airí gnóthaí eachtracha na hÍoslainne, Lichtinstéin agus na hIorua tráth a n-idirphlé pholaitiúil.

Gníomhartha de chuid an Aontais atá ábhartha maidir le LEE a ionchorprú

9. Agus an Tuarascáil ar Dhul chun Cinn ó Chomhchoiste LEE á tabhairt dá haire aici, léirigh Comhairle LEE gur mór aici obair an Chomhchoiste maidir le hoibriú rathúil agus feidhmiú fóna Chomhaontú LEE a áirithiú.

10. D'aithin Comhairle LEE an obair leanúnach atá á déanamh chun líon na ngníomhartha de chuid an Aontais atá ar feitheamh lena gcorprú i gComhaontú LEE a laghdú agus go ndearnadh dul chun cinn tábhachtach in 2024 agus in 2025 mar thoradh ar iarrachtaí comhpháirteacha institiúidí an Aontais agus Stáit CSTE LEE. Thug sí dá haire, áfach, go raibh an riaráiste fós ard, agus leag sí béim ar an ngá atá le tuilleadh iarrachtaí a dhéanamh agus leanúint den dlúthchomhar maidir le comhaid atá ann le fada chun deimhneacht dhlíthiúil agus aonchineálacht in LEE a áirithiú. Leag Comhairle LEE béim freisin ar a thábhachtaí atá sé a áirithiú go ndéanfar an *acquis* a thrasú go tráthúil i gcórais náisiúnta dlí.

Slándáil eacnamaíoch agus iomaíochas an Mhargaidh Inmheánaigh

11. D'aithin Comhairle LEE na dúshláin leanúnacha atá roimh an trádáil idirnáisiúnta tráth atá slabhraí soláthair domhanda faoi bhrú, agus d'athdhearbhaigh sí a tiomantas don trádáil oscailte chothrom inbhuanaithe agus do chaidreamh trádála riailbhunaithe.
12. Thairis sin, chuir Comhairle LEE i bhfios go láidir a thábhachtaí atá an Margadh Inmheánach chun iomaíochas, slándáil eacnamaíoch, athléimneacht, slándáil bia, athnuachan tionsclaíoch, ceannaireacht theicneolaíoch athléimneach agus tarraingteacht na hEorpa mar shuíomh gnó a áirithiú. Leanann an tAontas agus Stáit LEE CSTE de leas frithpháirteach a bheith acu maidir le Margadh Inmheánach dea-fheidhmiúil a áirithiú agus cothrom iomaíochta a choinneáil ar bun ar fud an domhain agus laistigh den Mhargadh Inmheánach de réir mar a fhorbraíonn beartais agus tionscnaimh nua chun dul i ngleic le dúshláin leanúnacha dhomhanda agus gheopholaitiúla i réimsí, mar shampla, an iomaíocht dhomhanda, an t-athrú aeráide, an dá aistriú, spleáchais straitéiseacha agus rioscaí don slabhra soláthair in earnálacha straitéiseacha.
13. Leag Comhairle LEE béim ar a thábhachtaí atá sé timpeallacht atá fabhrach don nuálaíocht agus don ghnó a chur ar fáil chun iomaíochas a neartú ar fud LEE agus thug sí dá haire a thábhachtaí atá sé spleáchais straitéiseacha in earnálacha íogaire a laghdú, chomh maith le próisis rialála a shimpliú.

14. Chuir Comhairle LEE i dtreis a thábhachtaí atá dlúthchomhar idir an tAontas agus Stáit CSTE LEE chun slándáil eacnamaíoch agus athléimneacht a mhéadú chomh maith le slabhraí soláthair a dhaingniú agus a neartú trí éagsúlú an tsoláthair agus trí acmhainneachtaí monaraíochta a fhorbairt sa Mhargadh Inmheánach, go háirithe i réimsí na dteicneolaíochtaí astaíochtaí nialasacha agus na dteicneolaíochtaí ísealastaíochtaí i gcomhréir le mír 28 den chéad Athbhreithniú Domhanda faoi Chomhaontú Pháras, agus i réimsí na sliseanna agus na n-amhábhhar criticiúil chomh maith. Ba cheart go ndíreodh slándáil eacnamaíoch laistigh de LEE ar iomaíochas a chur chun cinn ar fud LEE, agus ar chosaint a thabhairt ar rioscaí comhchoiteanna slándála eacnamaíche, agus ar chomhpháirtíocht le tíortha eile a bhfuil leasanna coiteanna acu.
15. D'admhaigh Comhairle LEE go dtugtar aghaidh go leordhóthanach i gClár Oibre Straitéiseach an Aontais 2024-2029 ar dhúshláin chomhroinnte Stáit LEE. Mhol sí na hiarrachtaí chun Margadh Inmheánach níos doimhne agus níos athléimní a fhorbairt ina dtacófar le príomhtheicneolaíochtaí na todhchaí agus ina n-áiritheofar iomaíochas fadtéarmach na hEorpa, agus ba dhíol sásaimh di na hiarrachtaí chun an Eoraip a choinneáil láidir agus slán.

An t-athrú aeráide, an bhithéagsúlacht agus an t-aistriú glas

16. D'aontaigh Comhairle LEE go bhfuil gá le harduailmhian leanúnach, iarracht chomhchoiteann agus gníomhaíocht phráinneach chun go n-áiritheofar an t-aistriú ionsar thodhchaí atá inbhuanaithe, cothrom ar bhonn sóisialta, aeráidneodrach agus neamhdhíobhálach don chomhshaol. D'iarr sí go n-aistrefaí ó bhreoslaí iontaise i gcórais fuinnimh ar bhealach cóir, ordúil agus cothrom, i gcomhréir le conairí 1.5 °C, agus dlús á chur le gníomhaíocht sa deacáid chriticiúil atá romhainn, chun glan-nialasacht a bhaint amach faoi 2050 i gcomhréir leis an eolaíocht. Ina theannta sin, d'iarr sí go ndéanfaí acmhainneacht fuinnimh in-athnuaite a mhéadú faoi thrí ar fud an domhain, meánráta bliantúil domhanda na bhfeabhsuithe éifeachtúlachta fuinnimh a dhúbailt faoi 2030 agus dlús a chur le teicneolaíochtaí astaíochtaí nialasacha agus teicneolaíochtaí ísealastaíochtaí. Ba dhíol sásaimh di gur foilsíodh an Comhaontú maidir le Tionsclaíocht Ghlan chun rannchuidiú le dícharbónú agus iomaíochas earnáil tionsclaíochta na hEorpa. D'aithin Comhairle LEE freisin a thábhachtaí atá soláthairtí fuinnimh atá slán, inacmhainne agus inbhuanaithe agus bonneagar fuinnimh na hEorpa a chosaint ar bhagairtí hibrideacha agus ar bhagairtí eile. Chuir Comhairle LEE i dtreis gur cheart, le straitéis chuimsitheach do dhícharbónú agus d'iomaíochas, intuarthacht a chur ar fáil don tionscal agus iarracht a dhéanamh gnólachtaí a mhealladh, a mhéadú agus a choinneáil ar bun laistigh den Eoraip.

17. D'admhaigh Comhairle LEE na héifeachtaí díobhálacha atá ag ionradh iomlán neamhdhleathach na Rúise ar an Úcráin ar earnáil an fhuinnimh san Eoraip agus thug sí dá haire an dul chun cinn atá déanta le plean REPowerEU an Choimisiúin Eorpaigh a chur chun feidhme, arb é is aidhm dó an spleáchas ar bhreoslaí iontaise na Rúise a laghdú. Thug sí dá haire go háirithe uailmhian mhéadaithe REPowerEU agus í ag aithint go bhfuil tábhacht leis na huailmhianta sin a bhaint amach, lena n-áirítear trí fhormáidí comhair réigiúnaigh i gcás inarb infheidhme.
18. Leag Comhairle LEE béim ar an ról lárnach atá ag praghsáil carbóin san aistriú glas agus ar an gcomhar leanúnach idir an tAontas agus Stáit CSTE LEE i bhforbairt Chóras Trádála Astaíochtaí an Aontais. Ba dhíol sásaimh di an obair leanúnach atá á déanamh maidir le Stáit CSTE LEE a áireamh sa Sásra Coigeartaithe Carbóin ar Theorainneacha. Leag Comhairle LEE béim freisin ar an ngá atá le bearta éifeachtacha chun inchreidteacht sonraí astaíochtaí a áirithiú agus chun leanúint de na hiarrachtaí chun iontaofacht sonraí tríú tíortha a áirithiú.
19. Ós rud é gur foinse mhór astaíochtaí san Eoraip é an t-iompar, d'athdhearbhaigh Comhairle LEE a thábhachtaí atá sé go n-oibríonn Stáit LEE le chéile i dtreo earnáil iompair inbhuanaithe, iomaíoch agus athléimneach. Ba dhíol sásaimh di na cuspóirí agus na gníomhartha maidir le haistriú glas na hearnála iompair sa phacáiste 'Oiriúnach do 55'. Leag Comhairle LEE béim ar mhodhanna inbhuanaithe iompair agus breoslaí inbhuanaithe a úsáid in LEE agus nascacht limistéar iargúlta, lena n-áirítear stáit oileánacha, agus an t-aistriú cóir á gcaomhnú ag an am céanna. Ina theannta sin, tá sé ríthábhachtach an toilleadh iarnróid a fheabhsú agus astaíochtaí ó iompar lastais de bhóthar a laghdú agus, dá bhrí sin, thug Comhairle LEE dá haire na tograí a áirítear sa Phacáiste maidir le hIompar Lasta a Ghlasú. Ba dhíol sásaimh don Chomhairle go bhfuiltear ag díriú níos mó ar an loingseoireacht ghlas agus ar an eitlíocht ghlas, lena n-áirítear breoslaí inbhuanaithe, agus bonneagair chalafoirt agus aerfoirt.

20. Chuir Comhairle LEE in iúl go bhfuil sí lántiomanta dlús a chur leis na hiarrachtaí chun dul i ngleic leis an athrú aeráide, an t-aistriú fuinnimh inbhuanaithe a shaothrú, agus leanúint den domhan nádúrtha a chosaint agus borradh a chur faoinár ngeilleagar ciorelach i gcoitinne chun ár n-iomaíochas a mhéadú. Leag Comhairle LEE béim ar a thábhachtaí atá sé leanúint den dlúthchomhar idir an tAontas agus Stáit CSTE LEE chun a spriocanna agus cuspóirí aeráide agus bithéagsúlachta faoi seach a bhaint amach agus cuspóirí Chomhaontú Pháras a chaomhnú. Chomhaontaigh Comhairle LEE go bhfuil sé ríthábhachtach aghaidh a thabhairt ar chailliúint na bithéagsúlachta, agus thug sí dá haire uailmhian an Aontais maidir le truailliú nialasach agus go bhfuil comhar i dtreo Eoraip níos glaine agus comhshaol atá saor ó thocsainí ina chuid ríthábhachtach de sin. Chuir Comhairle LEE i dtreis a thábhachtaí atá ailíniú rialála i réimse an gheilleagair chiorclaigh.
21. Á aithint di gur dúshlán dhomhanda iad an t-athrú aeráide agus cailliúint na bithéagsúlachta, d'athdhearbhaigh Comhairle LEE a tiomantas iomlán Clár Oibre 2030 na Náisiún Aontaithe agus Comhaontú Pháras agus Creat Domhanda Bithéagsúlachta Kunming-Montréal a chur chun feidhme arb iad sin na creataí iltaobhacha riachtanacha lena rialáítear gníomhaíocht dhomhanda i gcoinne an athraithe aeráide agus chailliúint na bithéagsúlachta. Agus aird á tabhairt ar thorthaí Chreat-Choinbhinsiún na Náisiún Aontaithe ar an Athrú Aeráide, COP28 agus COP29, leag Comhairle LEE béim ar an tábhacht leanúnach a bhaineann le huailmhian dhomhanda mhéadaithe faoi Chomhaontú Pháras. Chuige sin, mheas Comhairle LEE go raibh sé thar a bheith tábhachtach go gcuirfeadh na páirtithe uile a NDCanna, in iúl roimh COP30 in Belem, atá ailínithe le sprioc teochta 1.5 °C Chomhaontú Pháras agus le toradh Stocmharc Domhanda COP28, lena n-aithnítear an gá atá le laghdúithe doimhne, tapa agus marthanacha ar astaíochtaí gás ceaptha teasa. Chuir Comhairle LEE i dtreis gur gá do thíortha a spriocanna glan-nialasacha maidir le hastaíochtaí gás ceaptha teasa a leagan síos agus/nó dlús a chur leo agus idirphlé uailmhianach a shaothrú le príomh-chomhpháirtithe atá ar aon intinn leo. Thairis sin, thug Comhairle LEE dá haire uailmhian na hEorpa fanacht ar thús cadhnaíochta maidir lena gealltanais idirnáisiúnta bithéagsúlachta a bhaint amach, go háirithe na gealltanais a tugadh i gCreat Domhanda Bithéagsúlachta Kunming-Montréal. Agus aird á tabhairt ar an toradh a bhí ar an 16ú Comhdháil de chuid na bPáirtithe i gCoinbhinsiún na Náisiún Aontaithe maidir leis an mBithéagsúlacht, chuir Comhairle LEE i dtreis gur gá do na páirtithe uile a Straitéisí Náisiúnta agus a bPleananna Gníomhaíochta maidir leis an mBithéagsúlacht a thabhairt cothrom le dáta nó a athbhreithniú chun aghaidh a thabhairt go práinneach ar na cúiseanna díreacha agus indíreacha atá le cailliúint na bithéagsúlachta.

An claochlú digiteach

22. Chuir Comhairle LEE chun suntais go bhfuil sé ríthábhachtach saoirse agus iolrachas na meán a chosaint, neamhspleáchas eagarthóireachta agus iriseoirí a chosaint ar mhaithe le sochaí dhaonlathach dhea-fheidhmiúil sa ré dhigiteach, in éineacht le hurramú na luachanna ríthábhachtacha sin mar a leagtar síos i reachtaíocht ábhartha an Aontais, lena n-áirítear maidir le tacaíocht do na meáin neamhspleácha agus a gcistiú.
23. Leag Comhairle LEE béim ar a thábhachtaí atá sé go n-oibreodh Stáit LEE go dlúth le chéile chun claochlú digiteach iomaíoch cothrom athléimneach a áirithiú, agus chun go mbeidh an Eoraip ina ceannaire domhanda i dteicneolaíochtaí digiteacha straitéiseacha. Thairis sin, chuir sí i dtreis go bhfuil sé ríthábhachtach sláine agus athléimneacht an bhonneagair dhigitigh agus na seirbhísí digiteacha a chosaint chun ár sochaithe daonlathacha a chosaint agus chun ár luachanna Eorpacha a dhearbhú.
24. Ag tabhairt dá haire gur gá dlús a chur le IS a bheith á ghlacadh ag lucht tionsclaíochta, agus ag fiontair bheaga agus mheánmhéide, agus i gcomhréir leis an Ráiteas maidir le hIntleacht Shaorga Chuimsitheach Inbhuanaithe do Dhaoine agus don Phláinéad, a comhaontaíodh an 11 Feabhra 2025 i bPáras, thacaigh Comhairle LEE leis an Straitéis Cur i bhFeidhm IS atá beartaithe agus d'iarr sí go mbeadh na húdaráis, lucht tionsclaíochta agus an tsochaí shibhialta ó Stáit LEE rannpháirteach go dlúth ina cur chun feidhme. Thairis sin, chun luach sochaíoch agus nuálaíochta na sonraí a uasmhéadú, leag Comhairle LEE béim ar an ngá atá le hiarrachtaí breise a dhéanamh chun fíor-Aontas Sonraí Eorpach a chruthú, lena n-áirítear trí chomhlíonadh na reachtaíochta atá ann cheana a shimpliú agus trí rialachas sonraí a fheabhsú.
25. Leag Comhairle LEE béim ar a thábhachtaí atá sé an Gníomh um Sheirbhísí Digiteacha agus an Gníomh um Margaí Digiteacha a chorprú i gComhaontú LEE. Ag tabhairt dá haire na tairbhí eacnamaíocha, comhshaoil agus sochaíocha a bhaineann leis an intleacht shaorga (IS), d'aithin sí, thairis sin, a thábhachtaí atá sé creat rialála coiteann a bhunú don intleacht shaorga san Eoraip tríd an nGníomh um an Intleacht Shaorga, agus a áirithiú go mbeidh na córais intleachta saorga a chuirtear ar an Margadh Inmheánach agus a úsáidtear in LEE slán, iontaofa, eiticíúil agus go n-urramaítear cearta bunúsacha, luachanna Eorpacha agus prionsabail eiticíúla leo.

26. Thug Comhairle LEE dá haire a thábhachtaí atá sé an chibearshlándaíl a neartú agus daoine, institiúidí agus bonneagar criticiúil a chosaint ar bhagairtí hibrideacha. Ba dhíol sásaimh di an Teachtaireacht ón gCoimisiún maidir leis an bplean gníomhaíochta Eorpach i ndáil le cibearshlándaíl ospidéal agus soláthraithe cúraim sláinte, chomh maith le Gníomh um Chibear-Dhlúthpháirtíocht an Aontais atá beartaithe, agus d'iarr sí ar na Páirtithe i gComhaontú LEE leanúint den dlúthchomhar chun athléimneacht an Mhargaidh Inmheánaigh a mhéadú agus cibearbhagairtí a chosc.
27. D'aithin Comhairle LEE a thábhachtaí atá sé éiceachóras leathsheoltóirí na hEorpa a neartú leis an nGníomh Eorpach um Shliseanna trí shlabhraí soláthair a éagsúlú, ceannaireacht theicneolaíoch a chothabháil agus an acmhainneacht táirgeachta a fhorbairt.
28. Ba dhíol sásaimh do Chomhairle LEE Rialachán 2024/1183 lena leasaítear Rialachán 910/2014 maidir le bunú an Chreata Eorpaigh um Chéannacht Dhigiteach trí éifeachtacht an chreata reatha um chéannacht dhigiteach a fheabhsú chun idirbhearta trasteorann a dhaingniú agus trína thairbhí a leathnú chuig an earnáil phríobháideach.

An ghné shóisialta

29. Leag Comhairle LEE béim ar a thábhachtaí atá an ghné shóisialta i gComhaontú LEE, lena gcumhdaítear saincheisteanna a bhaineann le dlí an tsaothair, sláinte agus sábháilteacht ag an obair, agus comhionannas inscne. D'aithin Comhairle LEE a thábhachtaí atá margaí saothair agus córais leasa shóisialaigh atá cothrom dea-fheidhmiúil, agus a thábhachtaí atá sé rannpháirtíocht i margadh an tsaothair a mhéadú agus comhoiriúnú maith a áirithiú idir scileanna agus riachtanais mhargadh an tsaothair, mar bheart ríthábhachtach chun claochlú glas cothrom digiteach a bhaint amach agus chun iomaíochas an Mhargaidh Inmheánaigh a neartú.
30. Agus béim á leagan aici ar a thábhachtaí atá sé cosaint shóisialta, comhdheiseanna agus dálaí oibre córa a áirithiú, ba dhíol sásaimh do Chomhairle LEE an dul chun cinn atá déanta maidir le cur chun feidhme Cholún Eorpach na gCeart Sóisialta, creat arb aidhm di Eoraip níos cuimsithí, níos athléimní agus níos iomaíche a chruthú.

An comhar i réimse na sláinte

31. Thug Comhairle LEE aird ar na ceachtanna straitéiseacha a foghlaimíodh ón ullmhacht agus freagairt i dtaca le héigeandáil sláinte sa LEE le linn phaindéim COVID-19. Ba thosaíochtaí bunriachtanacha i gcónaí iad sa chomhthéacs sin sláine an Mhargaidh Inmheánaigh agus feidhmiú rianúil Chomhaontú LEE.
32. Leag Comhairle LEE béim ar a thábhachtaí atá sé Aontas Sláinte na hEorpa a fhorbairt, agus bhí sí ag tnúth le comhar níos dlúithe idir an tAontas agus Stáit CSTE LEE maidir le hullmhacht agus freagairt sláinte. Thug Comhairle LEE dá haire freisin an togra le haghaidh rialachán i réimse na gcógas leighis criticiúil d'fhonn slabhraí soláthair níos athléimní a chumasú agus acmhainneachtaí táirgeachta na hEorpa a neartú. Bhí Comhairle LEE ag tnúth chomh maith le dul chun cinn breise leis an athchóiriú ar reachtaíocht chógaisíochta an Aontais lena dtugtar aghaidh ar rochtain chomhionann thráthúil ar tháirgí íocshláinte atá sábháilte, éifeachtach agus inacmhainne, ar shlándáil soláthair táirgí íocshláinte agus ar thimpeallacht tharraingteach atá fabhrach don nuálaíocht a chur ar fáil le haghaidh taighde, infheistíocht, forbairt agus táirgeadh cógas san Eoraip, chomh maith le bearta lena dtugtar aghaidh ar fhrithsheasmhacht fhrithmhiocróbach.
33. Leag Comhairle LEE béim ar a thábhachtaí atá sé gníomhaíochtaí an Aontais maidir le cúram agus meabhairshláinte a neartú, agus cumais agus athléimneacht na gcóras sláinte a neartú a thuilleadh, lena n-áirítear an athléimneacht aeráide, go háirithe i réimsí inar nochtadh easnaimh de dheasca na paindéime.

Cláir agus gníomhaireachtaí de chuid an Aontais

34. Á admháil di an rannchuidiú ó chláir de chuid an Aontais chun Eoraip níos glaise, níos digití agus níos athléimní a thógáil, chuir Comhairle LEE i dtreis a thábhachtaí atá rannpháirtíocht Stáit CSTE LEE i roinnt clár éagsúil de chuid an Aontais sa tréimhse 2021 go dtí 2027 agus d'aithin sí a ranníocaíocht shuntasach airgeadais leis na cláir.

35. Leag Comhairle LEE béim ar an gcaoi a bhforáiltear le hAirteagal 78 de Chomhaontú LEE go ndéanfaidh na Páirtithe Conarthacha comhar a neartú agus a leathnú i roinnt réimsí lasmuigh de na ceithre shaoirse. Ba cheart go mbeadh rochtain ag Stáit CSTE LEE ar gach cuid de na cláir ina bhfuil siad rannpháirteach. Leag Comhairle LEE béim ar a thábhachtaí atá sé feabhas a chur ar an tslándáil taighde agus d'iarr sí ar na Páirtithe oibriú go dlúth le chéile i ndáil leis sin, lena n-áirítear trí bhainistiú riosca agus bearta iomchuí eile a úsáid. Ráthaítear leis an gComhaontú cearta agus oibleagáidí combhionanna a chomhaltaí uile agus tá sé ríthábhachtach go n-urramófar na prionsabail sin ar mhaithe le dea-fheidhmiú an Chomhaontaithe. Mhol Comhairle LEE go háirithe do gach comhlacht cur chun feidhme ar na leibhéal Eorpacha agus náisiúnta deiseanna comhpháirtíochta a phoibliú agus a chur chun cinn ar fud LEE agus a áirithiú go gcuirfear na gníomhaithe uile go hiomlán ar an eolas faoi chearta agus oibleagáidí Stáit CSTE LEE agus iad ag glacadh páirt i gcláir an Aontais.
36. Leag Comhairle LEE béim ar an gcaoi a bhfuil comhar leathan i réimse an spáis ríthábhachtach chun bonn tionsclaíoch na hEorpa a neartú agus chun sláine agus dea-fheidhmiú an Mhargaidh Innheánaigh a chaomhnú. Thug sí dá haire an plé leanúnach maidir le rannpháirtíocht Stáit CSTE LEE sa Chlár um Nascacht Shlán.
37. Gan dochar don chaibidlíocht ar leibhéal an Aontais faoin gcreat airgeadais ilbhliantúil atá ar na bioráin, d'iarr Comhairle LEE idirphlé leanúnach maidir leis na hullmhúcháin don chlárthréimhse tar éis 2027 agus é mar aidhm aige a áirithiú go ndéanfaí rialacháin nua maidir le cláir a chorprú go luath i gComhaontú LEE, agus é á chur san áireamh go leanann rannpháirtíocht Stáit CSTE LEE as forálacha Chomhaontú LEE. Ina theannta sin, leag Comhairle LEE béim ar a thábhachtaí atá sé dlúthchomhar a áirithiú idir Stáit CSTE LEE agus an tAontas Eorpach maidir le cláir de chuid an Aontais a bheidh ann amach anseo a mhúnlú i gcomhréir le Comhaontú LEE.
38. Tharraing Comhairle LEE aird ar a thábhachtaí atá sé, chun rannchuidiú leis an gcomhrac i gcoinne sciúradh airgid agus mhaoiniú na sceimhlitheoireachta, pacáiste an Aontais um fhrithsciúradh airgid agus um chomhrac mhaoiniú na sceimhlitheoireachta a ionchorprú i gComhaontú LEE, ar ionchorprú é atá ar na bacáin.

Sásraí Airgeadais

39. Meabhraíodh do Chomhairle LEE go bhforáiltear le Comhaontú LEE do rannpháirtíocht Stáit CSTE LEE sa Mhargadh Inmheánach agus, sa chomhthéacs sin, meabhraíodh di freisin go rannchuidíonn Stáit CSTE LEE le héagothromaíochtaí sóisialta agus eacnamaíocha laistigh de LEE a laghdú trí Shásraí Airgeadais LEE agus na hIorua ar mhaithe leis na Páirtithe Conarthacha, d'fhonn neartú leanúnach cothrom an chaidrimh trádála agus eacnamaíoch idir na Páirtithe Conarthacha uile i gComhaontú LEE a chur chun cinn i gcomhréir le hAirteagal 115 LEE.
40. Ba dhíol sásaimh do Chomhairle LEE cur chun feidhme agus cur i bhfeidhm sealadach an Chomhaontaithe maidir le Sásra Airgeadais LEE don tréimhse ó mhí Bealtaine 2021 go dtí mí Aibreáin 2028 idir an Íoslainn, Lichtinstéin, an Iorua agus an tAontas, agus gur síníodh an Comhaontú idir an Iorua agus an tAontas maidir le Sásra Airgeadais na hIorua don tréimhse ó mhí Bealtaine 2021 do dtí mí Aibreáin 2028, agus is fada léi go dtabharfar an próiseas daingniúcháin chun críche agus teacht i bhfeidhm an dá chomhaontú.
41. Agus é mar aidhm aici na Sásraí Airgeadais a chur chun feidhme don tréimhse ó mhí Bealtaine 2021 go dtí mí Aibreáin 2028, tá Comhairle LEE ag tnúth leis na meabhráin dhéthaobhacha tuisceana agus na comhaontuithe cláir idir Stáit CSTE LEE agus na Stáit is Tairbhíthe uile a thabhairt i gcrích go pras chun creat agus amlíne shoiléir a leagan síos ar mhaithe le cur chun feidhme éifeachtach tráthúil na gcistí, rud a rannchuideoidh leis na tosaíochtaí téamacha a comhaontaíodh, an t-aistriú glas Eorpach, an daonlathas, an smacht reachta agus cearta an duine agus cuimsiú sóisialta agus athléimneacht.
42. Chuir Comhairle LEE i bhfios go láidir go ndéanfaidh na Páirtithe Conarthacha, i bhfianaise Airteagal 10 i bPrótacal 38D, athbhreithniú ar an ngá atá le haghaidh a thabhairt ar éagothromaíochtaí eacnamaíocha agus sóisialta sa Limistéar Eorpach Eacnamaíoch agus, bunaithe ar an measúnú sin, go gcuirfidh siad tús leis an gcaibidlíocht a bheidh ann amach anseo maidir leis na chéad Sásraí Airgeadais eile, i bhfad sula rachaidh na Sásraí Airgeadais 2021-2028 in éag, chun bearnaí sa chur chun feidhme a sheachaint agus ionas go mbeifear in ann an pheirspictíocht chistiúcháin don todhchaí a chlársceidealú ar bhealach éifeachtúil éifeachtach.

Iascach agus rochtain ar an margadh d'iasc agus táirgí iascaigh

43. Thug Comhairle LEE dá haire gur cuireadh chun feidhme agus gur cuireadh i bhfeidhm ar bhonn sealadach an dá phrótacal bhreise a ghabhann le comhaontuithe déthaobhacha an Aontais leis an Iorua agus leis an Íoslainn lena bhforáiltear do tharaif-chuótaí chun táirgí áirithe éisc agus iascaigh de thionscnamh na dtíortha sin a allmhairiú isteach i margadh an Aontais go dtí mí Aibreáin 2028.
44. D'athdhearbhaigh Comhairle LEE freisin na gealltanais a leagtar amach i bPrótacal 9 a ghabhann le Comhaontú LEE maidir le trádáil éisc agus táirgí muirí eile.
45. Leag comhaltaí Chomhairle LEE béim ar a thábhachtaí atá comhar cuiditheach maidir le hábhair iascaigh agus ba cheart don chomhar sin a bheith cothrom agus dul chun tairbhe an dá thaobh, go háirithe maidir le bainistiú inbhuanaithe stoic a bhainistítear go comhpháirteach.
46. D'aithin comhaltaí Chomhairle LEE a thábhachtaí atá sé leanúint d'aghaidh a thabhairt ar na saincheistanna faoi seach atá fós gan réiteach, a bhaineann le beartais iascaigh, agus d'aithin an tábacht a bhaineann leis an idirphlé déthaobhach i mbainistiú iascaigh idir an tAontas agus Stáit ábhartha CSTE LEE.

Trádáil talmhaíochta

47. Meabhraíodh do Chomhairle LEE gealltanais na bPáirtithe Conarthacha, i gcomhréir le hAirteagal 19 de Chomhaontú LEE, agus d'iarr sí ar na páirtithe leanúint den idirphlé chun athbhreithniú a dhéanamh ar na coinníollacha trádála i gcás táirgí talmhaíochta chun léirscaoileadh forchéimnitheach a bhaint amach faoi chuimsiú a mbeartas talmhaíochta faoi seach. Mhol Comhairle LEE do na bPáirtithe Conarthacha athbhreithniú nua a dhéanamh ar an gcóras trádála le haghaidh táirgí talmhaíochta próiseáilte faoi chuimsiú Airteagal 2(2) agus Airteagal 6 de Phrótacal 3 a ghabhann le Comhaontú LEE chun an trádáil a chur chun cinn a thuilleadh sa réimse seo.